

# Majestic Carnival Group un biaha mas grupo di aña

Pan di Dios Roadmarch 2013 OREO banda di aña



ORANJESTAD (AAN): Aruba a goza di un fin di siman colorido di dos parada di carnaval cu a encanta tur hende. Na San Nicolas e pasada di e grupo tabata tin un promedio di 2.30 ora pa 2.45 ora y na Playa di 3 ora y 3.15 ora dependiendo di e lugar unda el a pasa.

E comentario tabata cu e parada tabata cortico of chikito, pero mirando su duracion, e pregunta ta e ora ey, con lo ta cu e parada di carnaval 60. Con largo esaki lo ta y cuanto e lo dura?

Majestic tabata e grupo cu a conquista curazon di mirones sigur y a termina tambe como e Grupo di Aña, algo cu hopi a spera for di diasabra caba, principalmente nan curazon di "Stima nos pais" cu tabata habri den dos, a impresiona masha hopi.

Sinembargo tin cu menciona cu tur grupo a presenta lo mihor posibel y tabata tin posibilidadnan di cay den premiacion y hasta termina como grupo di aña.

Pa animacion riba caya, ta tur grupo tabata tin seccionnan of

masa cu a sobresali, pero dependiendo tambe unda hurado tabata pa por escoge e premiacion di grupo di mas ambiente of mas anima. Champagne, OPC, Pleasers and Teasers, Los Laga Bai, Dushi Carnival Group, Majestic, y Royal Carnival Group sigur a duna e publico e animacion y ambiente cu nan a spera. Un mas cu otro na e diferente partinan di e parada.

Den Musica indudablemente OREO tabata e agrupacion musical cu a sobresali riba tur tereno musical durnate e parada aki, sin kita afo e animacion di D'Licous cu Majestic, Tsunami cu Champagne, Robert y su Solo Bnda Show cu Los Laga Bai, le Groove cu Pleasers and Teasers cu a anima masha hopi.

E participacion tabata entre 1800 y 1900 mientras cu e intencion di participacion prome cu paradanan tabata di 1855 na San Nicolas y 1966 na Playa, locual a resulta poco menos cu e cifra di intencion.

Segun president di SAC, manan caba ta cuminsa prepara pa Carnaval 60 y ademas tin varios grupo tambe den preparacion caba pa carnaval 60 otro aña.

E cancion "Pan di Dios" di Claudius Philips, interpreta pa Jairo Everts como Buchi Cunucu a termina como Roadmarch 2013 mientras cu OREO ademas a termina como banda di Aña.